

Annern Stää.....

Vier stolze Tierm aus leuchtend-routem Stää
sou stäiht des Schloß bei uns hoch iwerm Mää.
Ich wäß es noch: es wor vor viele John,
ich wor ä Mäde mit viel Struwelhoorn,
do hot' bei uns zur Stuwwe roigeguckt
de Schloßgeist un bei mir im Kopp gespuckt.
Des Mäanzerrad, des iwerm Fenster stäiht,
sell hot sich nochts bei mir im Draam gedreht.
De Schwedekönig Gustav der stourmt o
un greischt voll Wut: des Schloß, des steck ich o!
Wenn's Räder hätt' sou hätt ichs mitgenumme,
sou awer soll's im Flammemeer unkumme!

Der Pater Bernhard der sächt ohne Angst:
Herr König, vor du mit dem Brand afangst
da mach doi Aache erscht mol richtich uff!
An unserm Schloß sein hunderd Räder druff!

Der König sieht es un vergißt soi Wut.
Sächt: Pfäfflein, Pfäfflein du gefällst mer gut.
In eener Stadt, wo solch ein Pfäfflein wohnt,
do soi des wunnerscheene Schloß verschont.--

Der Kinnerdraam ging viel zu schnell vorbei.
Längst is es Herbst. Wor's werklich emol Mai?
Krieg kom ins Land mit gor viel Leid un Not.
Viel unsrer Freunde worn uff emol tot.
Aus unsern Häusern wurde Dreck und Schutt.
Ach unser Fachwerkhaus es ging kaputt.
Moi Eltern hawwe de Handwaache gezooche,
mir Kinner hawwe hinne nachgeschoowe.
In Wirklichkeit gabs gor nit viel zu schiewe:
E halb verbrennt Matraz wor uns gebliewe,
en orch verbeulte Dippe mit verußtem Esse..
Da hom mer, daß es Weihnacht is vergesse,
Mer worn des Lewens nimmer richtich froh.
Mer dappte irchendwo ins Nirchendwo.
Dort, wou deß Mää dorch Brickebooche geht,
do hom mer uns noch emol umgedreht

zu unserm Märcheschloß. D e r Draam wor aus!
Denn ohne Schloß sinn nirchends mer zuhaus.

Am Owend hom mer dann e Zimmer funne;
gute Verwandte hom uns uffgenumme.

Es Hämweh blieb. Die Sehnsucht wor zu grouß
nach unserm wunnerscheene alte Schloß.

Schon bald druff häßt's: die ganze Stadt dut brenne!
Mer dun schnell alle uff de Speicher renne.

Es Schloß! Es Schloß! so greische mer zusamme.

Aus weiter Fern do sähe mer vier Flamme
grouß und gewaltich bis zum Himmel brenne,

Mer stäihn am Fenster un dun alle flenne.

Wos Gustav Adolf domols hot verschont,
is jetzt von routem Feuerbrand enthront.

Die Zeit vergeht. Mer sein zurick gekumme,
ham uns e kläne Mietwohnung genumme.

Un ach es Schloß is widder uffgebaut.

Doch is es uns jetzt nimmer sou vertraut
wie's domols wor in meiner Kinnerzeit.

En Draam is anners als die Wirklichkeit.

Un was do stäiht hoch iwwer unserm Mää
is unser Schloß. - Doch sin's halt annre Stää.

